

DOS LUNA DI PRISON PA HOMBER CU A MUSTRA MUCHANAN VIDEO PORNOGRAFICO Y A MISHI CU NAN

ORANJESTAD(AAN) -- Diabierna Corte den Promer Instancia a trata e caso cu Ministerio Publico a cuminsa contra un homber kende ta ser sospecha di a pasa videonan

pornografico pa muchanan menor di edad y a mishi cu nan

Door cu tin un palabracion entre prensa y Jueznan di Corte den Promer Instancia

cu den casonan di violacion y actonan immoral no ta publica number di e acusado y tampoco e victimanan pasobra nos ta un comunidad chikito y facil hende ta haya sa ta ken

y esaki lo por afecta e victimanan mas.

Den e caso aki e homber ta desmenti categoricamente cu el a pasa videonan pornografico pa e muchanan y lo a mishi cu un di e muchanan na su atras.

E homber a bisa cu e no sa mes cu e muchanan a mishi cu e video ya cu e muchanan ta bay su cas y ta pasa nan videonan y aparentemente nan a coy un di dje. Segun e homber e video no ta pornografico sino un video conoci caminda ta mira homber ta tene relacion cu muher.

E homber aki tabata un adicto na droga y un recidivista. Awor el a cambia su biba completamente. El a bisa Juez cu e muchanan nan mama ta un adicto na droga y e mama y e muchanan ta bay come cerca dje. El a splica cu e muchanan ta mas na su cas cu na nan cas pasobra nan mama no tin tempo pa nan. El a desmenti categoricamente e declaracion di un di e muchanan kende a bisa cu mientras nan tabata sinta y mira e

video, e homber a pasa man na su atras.

Fiscal a bisa cu pasamento di video pornografico pa mucha menor di edad ta di condena y tambe cu e homber a mishi cu un mucha muher menor di edad. E ta haya cu e homber mester a evita cu e muchanan ta mira e video pornografico. Ademá Fiscal ta haya cu e homber mester laga su mannan na cas y no mishi cu mucha muher. El a exigi 6 luna di prison di cual 3 luna ta condicional cu un tempo di prueba di 2 aña.

Juez a cera tratamento di e caso y a dicta sentencia di biaha. E ta haya cu a base di e declaracion di e muchanan, mester considera cu e homber a pasa video pornografico y a mishi cu un mucha menor di edad. El a condena e homber na 4 luna di prison di cual 2 luna ta condicional cu un tempo di prueba di 2 aña.

E homber no a keda di acuerdo cu e sentencia y a bisa Juez cu e ta bay apela e caso pasobra e sa cu e no a haci nada malo.

Kende tabata goberna durante e escandalo barco "Daniel Leo"?

ORANJESTAD (AAN): E dianan aki tin basta comentario riba e buki di Zaandam esta "Kuepo Policial Quo Vadis?"

Sin embargo, lo ta hopi interesante tambe lo ta si acaso worde instala un comision pa investiga contenido di e buki, lo ta na su lugar pa habri mesora tambe e famoso caso di barco "Daniel Leo".

Mester di claridad kico tabata pasando desde cu e barco aki tabata worde usa pa pesca den awanan rond di Aruba pa despues esaki tabata "riba un trip" te na entre otro Suriname.

Un di esnan responsable di e barco aki te ainda ta cana rond na Aruba e por duna

cuenta na autoridad posiblemente lo por saca informe masha interesante. Mientras atravez di tempo un deurwaarder lo a ricibi orden di Huez pa confisca barco "Daniel Leo".

E deurwaarder a pone esaki na cadena pero despues aparentemente di algun dia of siman pa su sorpresa e barco misteriosamente a desaparece. Despues di tempo e barco aki a worde intercepta na Europa carga cu droga. Parce tin informe cu lo ta indica cu lo a usa e barco aki pa pasa droga sin control.

Kende a ordena of cu coop-

eracion di kende esaki lo a tuma lugar mester di claridad pa kita tur e sospechosonan cu tin riba gobernantenan di e tempo ey. Mescos cu cierto politiconan ta exigi documentonan y investigacion ya cu comunidad tambe kier sa kico a pasa cu barco, mas ainda a usa number di un diputado den e caso aki Daniel Leo pa bautiza e barco na su number y lo a mal usa number di e persona en cuestion pa traficacion di droga.

E ta un berdadero berguenza cu mester claridad for di nos gobernantenan y riba corto plazo.

Fiscal a bisa un gulido di bolitas

Si un hende kier gana placa e mester traha y no bay transporta cocaina

ORANJESTAD(AAN) -- Fiscal a hala e Curasoleño Igmor Romano Leuteria su atencion cu ora un hende kier gana placa e mester traha y no bay transporta cocaina.

Dia 26 di November 1999 miembronan di Douane a detene Leuteria na aeropuerto ora a descubri 336 gram di cocaina scondi den banda falso di un maleta. E droga tabata destina pa Hulanda y Leuteria a viaha di Curaçao pa Aruba pa despues aborda KLM pa bay Hulanda. Su plan no a resulta y awor lo mester sinta castigo di prison

Fiscal ta haya cu Leuteria a prepara e maleta bon pa evita cu cacho antidroga ta descubri esaki. El a bisa cu si un hende kier gana placa e mester traha pa yega na esaki.

El a exigi 8 luna di prison kitando e tempo cu Leuteria a pasa den detencion preventivo.

